

Rapport annual 2015

Fundaziun PUNTREIS / PUNTREIS Center da sanadad SA

Igl onn 2015 ei stau gl'emprem onn da menaschi cumplein cun ils dus loghens Sedrun e Mustér. Aschia han las structures da menaschi saviu crescher e fitgar pei. Igl ei semussau ch'ils menaschis da PUNTREIS han ina muntada centrala economica per las treis vischnaucas da Tujetsch, Medel e Mustér.

Fundaziun PUNTREIS

Cun l'entschatta schaner 2015 ha il Cussegl da fundaziun - che secumpona da niev da 6 commembers/commembras e quei mintgamai cun dus representants dallas 3 vischnaucas - surpriu l'incumbensa. Il Cussegl da fundaziun secumpona dil president Clemens Berther (Segnas), dalla vicepresidente Marlis Venzin-Spescha (Fuorns) e dils commembers/dallas commembras Karin Bär (Rueras), Arno Berther (Sedrun), Carmelia Bundi-Jacomet (Curaglia) e Livio Zanetti (Mustér).

Cun las novas structures ein las incumbensas dalla Fundaziun PUNTREIS e quellas dalla PUNTREIS Center da sanadad SA vegnidas reorganisadas. La Fundaziun PUNTREIS ei responsabla per las immobilias ed ha ina cuvegna da prestaziun cun la Regiun da planisaziun Sursassiala. Il menaschi ei vegnius surdaus tenor ina cuvegna da prestaziun alla feglia PUNTREIS Center da sanadad SA. Cun quei model ei la trasparenza garantida.

La PUNTREIS Center da sanadad SA ei tuttafatg independenta e meina il menaschi tenor criteris economics. Annualmein approbescha la Fundaziun PUNTREIS il quen dalla PUNTREIS Center da sanadad SA e metta tenor basegns ils signals necessaris. La maxima absoluta ei da menar la PUNTREIS Center da sanadad SA aschibein che nus stuein buca engraviar ils quens communal da nossas vischnaucas da Medel, Tujetsch e Mustér.

Sper las incumbensas ordinarias ha la Fundaziun PUNTREIS approbau il reglament d'organisaziun e menaschi. Intensivamein ei la Fundaziun PUNTREIS sefatschentada cun il project «Residenza da senioras e seniors» a Sedrun. La cumissiun da baghegiar sut il presidi dad André Schmid ha menau atras la concorrenza d'architectura cun sustegn d'ina giuria da specialists externs. La Fundaziun PUNTREIS ha elegiu il project «star bein» dil biro d'architectura Schaufelbühl Ruf Architekten GmbH da Cuera ch'ei vegnius classificaus sin gl'emprem plaz. Tuts projects inoltra ein stai d'aulta qualidad?

La Fundaziun PUNTREIS ha approbau in credit da frs. 120'000.00 per elaborar in preproject cun la survesta dils cuosts. Quel duei esser sin meisa la primavera 2016. Silsuenter sto la finanziaziun vegnir reglada. En emprema lingia vegnan ils organs politics dalla vischnaunca da Tujetsch contactai per in credit ed il rest sto vegnir finanziaus entras instituts bancars.

La Fundaziun PUNTREIS vegn a far tut il pusseivel per realisar quella residenza a Sedrun. Quei reussescha denton mo cun gl'agid da vischinas e vischins dalla vischnaunca da Tujetsch.

In grond engraziament a tuttas e tuts che s'engaschan per la PUNTREIS Center da sanadad SA a Mustér sco era per la Tgèsa s. Vigeli a Sedrun e naturalmein al Cussegl d'administraziun PUNTREIS Center da sanadad SA cun il meinafatschenta Diego Deplazes.

PUNTREIS Center da sanadad SA

Il Cussegl d'administraziun secumpona dil president Peter Binz (Medel), dil vicepresident Baseli Berther (Rueras) e dils commembers/dallas commembras Alice Deragisch (Sedrun), Clau Giusep Flepp (Curaglia), Hans Huonder (Mustér) e Cecilia Maissen-Desax (Mustér).

Suenter in temps da survetsch da biabein 2.5 onns banduna il meinafatschenta Ralf Kock ils 31 d'ost 2015 il menaschi PUNTREIS Center da sanadad SA per s'orientar professiunalmein da niev. Ad el admetta il Cussegl d'administraziun in sincer e cordial engraziament per tut il prestau duront quei temps da bia midadas.

Cun l'entschatta october 2015 surpren Diego Deplazes sia incarica sco meinafatschenta dalla PUNTREIS Center da sanadad SA cun ils dus loghens da survetsch Mustér e Sedrun e quei cun in pensum da 50% entochen la fin digl onn. Naven da 2016 vegn Diego Deplazes a surprender sia incumbensa cun in pensum cumplein. Diego Deplazes ha menau duront 6 onns la Curatella professiunala Surselva ed aschia rimnau experientschas sin il sector dil management dad organisaziuns da non-profit e sil sector dad attempai. Il Cussegl d'administraziun giavischa al niev meinafatschenta bia satisfacziun ed in bien maun en sia nova incumbensa.

PUNTREIS Center da sanadad SA (Mustér)

Egl onn da menaschi havein nus saviu far beinvegni a 19 cussadents ni novas cussadentas tier nus a Mustér - 11 persunas ein vegnidas da casa, 5 persunas dil spital e 3 persunas ein vegnidas d'autras instituziuns.

Nus havein stuiu prender cumiau per adina da 14 cussadents/cussadentas, 1 cussadent ha midau instituziun e 3 cussadents ein turnai a casa. Per ils 31 da december 2015 ei 1 letg libers e quei en ina combra dubla sin la partiziun da demenza. Il grad d'occupaziun cun total 18'509 dis da tgira munta a 93.13%.

Igl onn 2015 ein 15 conlvrers/conlvreras (da quei ina persuna muort vegliadetgna da pensiun ed ina persuna ha terminau gl'emprendissadi) extrai ord nies menaschi e 22 conlvrers havein nus saviu beneventar tier nus. El tagl havein nus occupau 72 conlvrers/conlvreras repartiu sin 61.72% plazzas cumpleinas; quei munta in grad d'occupaziun per conlvrer/conlvrera da rodund 83.71%.

PUNTREIS Center da sanadad SA (Sedrun)

A Sedrun havein nus stuiu prender cumiau per adina da 5 cussadents/cussadentas, 1 persuna ha midau instituziun ed 1 persuna ei turnada a casa; entradas havein nus giu 3. Il diember da cussadents/cussadentas ei sesminuius naven dall'entschatta digl onn cun 21 cussadents/cussadentas sin 17 per ils 31 da december 2015. La Tgèsa s. Vigeli astga dar dimora cun tgira a sulettamein 17 cussadents/cussadentas – quei tenor las directivas dil cantun respectiv digl Uffeci da sanadad dil Grischun. Quei ei il motiv pertgei ch'il diember da cussadents/cussadentas ei sereducius sin tala moda el decuors digl onn 2015.

Per ils 31 da december 2015 ein negins letgs libers. Il grad d'ccupaziun cun total 6'642 dis da tgira munta a 100%.

Igl onn 2015 ein 6 conlvrers/conlvreras extrai ord nies menaschi e 2 conlvrers/ conlvreras ein entrai en uffeci. El tagl havein nus occupau 32 conlvrers/conlvreras cun ina media da pensum da 62%.

Il Cussegl d'administraziun da PUNTREIS Center da sanadad SA ei sedecidius da serrar definitivamein la Tgèsa s. Vigeli sin ils 30 d'avrel 2017 e quei sin fundament che la Regiun da planisaziun Sursassiala ha il dretg sin sulettamein 58 letgs da tgira e ch'il cantun haveva dau la

lubientscha transitoria per 17 letgs a Sedrun. Ils cussadents/cussadentas, il personal sco era la populaziun ein vegni informai sur da quei fatg il schaner 2016.

El decuors digl onn 2016 vegn l'administraziun da PUNTREIS Center da sanadad SA ad encurir novas sligiazions per ils cussadents e las cussadentas che ston bandunar la Tgèsa s. Vigeli e quei en stretg contact cun tut ils pertuccai.

Al personal pertuccau vegn medemamein purschiu maun per anflar sligiazions individualas.

Entochen la serrada definitiva dalla Tgèsa s. Vigeli offerescha PUNTREIS da niev aunc combras cun prestaziuns supplementaras per attempai.

Engraziament

In cordial engraziament admettein nus allas cussadentas ed als cussadents, als tierparents sco era all'entira populaziun dallas vischnauncas da Medel, Tujetsch e Mustér per lur confidanza enviers nossa instituziun PUNTREIS Center da sanadad SA.

Per che nies menaschi sespleighi senza grondas difficultads e per dar damogn als pensums e giavischs da tut ils cumpigliai drova ei dabia mauns che lavuran bein in cun l'auter e muossan in grond senn da responsabladad. Nus engraziein grondamein al personal sin tut ils scalems operativs, sco era als commembers dil Cussegl da fundaziun PUNTREIS ed als commembers dil Cussegl d'administraziun PUNTREIS Center da sanadad SA per lur engaschi en favur da nossa instituziun e dils cussadents e dallas cussadentas.

A sur Georg ed a sur Tomas cun lur gidontras e gidonters engraziein nus per lur accumpignament pastoral e per las messas jamnilas en nossas capluttas. Per la buna collaboraziun engraziein nus als miedis dr. Huonder, dr. Lechmann, dr. Schönle e dr. Fischbacher.

Sco finiziun engraziein nus alla Regiun da planisaziun dallas vischnauncas da Mustér, Medel e Tujetsch per la confidanza demussada enviers nus.



Clemens Berther
President Cussegl da fundaziun

Diego Deplazes
meinafatschenta



Peter Binz
President Cussegl d'administraziun

Diego Deplazes
meinafatschenta